

今白華堂文集

送及門諸子赴會試序

余忝月湖講席久矣歲己亥冬盧子杰等以北上來辭酌酒送之日自余就傅至弱冠邑中科舉寥寥值會試上公車者纔十二三人其後鄉薦稍加稠焉然積至乙丑禮闈視前數亦祇增一倍今則每科幾五十人可不謂盛哉以春榜數之乾隆朝止十八人館選自丙辰後絕響八十餘載今嘉慶以來已得十四進士而三翰林復聯翩其間則尤盛之盛者也或謂近時金花榜子書院率居什九可爲主講者幸固也惟余亦有紀盛之作夫豈敢任功聊竊自幸耳雖然科第足以重人人當有以重科第郵自宋端拱

迄今進士九百七十有奇莫夥於宋明亦幾及其半元則僅二人耳然卽一時叔先生能紹程朱已爲後學所賴而宋明之類此者亦視圭袞台鼎較勝焉否則紛紛籍籍惟榮利是務甚或播惡於高位世爲鄉黨僂笑雖上第巍科奚足使其人重猶違言爲門牆光乎志乘所載至有若繁林翳蒼良楛雜糅余未嘗不因其選舉之盛而彌歎其運之衰也我朝

列聖作人鄞鄉前輩登政府者尙尠時至氣動非目前諸子之望而誰望諸子皆余所夙契而心許爲足重者今之行必將有得焉其以品學持運會於極盛之餘相與比肩

競之習尙培瀟厚之氣脈而余得偃仰湖濱遙望朝列忻
忻焉爲

國家卜萬年有道之長其亦可以私自幸也夫

外曾王父則友陳先生傳

余家藏小戴記數卷中有丹筆細書所援據鄭孔注疏及
衛氏集說吳氏纂言胡氏大全無不備參校同異衷於一
是者無不確其楷法效褚虞無不精先妣示槐曰此吾祖
則友公手澤宜珍祕也然公生平非先妣幼年所能悉略
彷彿一二以爲道貌肅然館東石石氏授徒甚顯非值歲
試不入城試則屢冠黌宮而已小山周先生者負鄉望與
公鄰館嘗執後輩禮嚴事公於通款時致副啟數百言夾
存公遺籍內有元禮模楷大春紛綸企金山而未登窺玉
海而不測之語槐得之以諗先生時距公逝世久先生年

已七十矣猶仰屋梁浩歎曰經師哉人師哉然公高介絕俗士類罕能知者陳故明所稱嘉靖入才子中后岡提學之裔宗支頗繁顧譜系失修墜緒茫茫無考我外大父之卒槐方在孩提其後舅氏飄零早世一表弟隨殤乏繼嗣雖尙有近屬今俱不知所往而公之澤斬矣嗚呼世人於外祖以上能述及高曾者不少而槐獨惛然卽欲承春秋窀穸事求其生卒及葬所皆不可得爲公悲又竊自悲也且名者沒世所稱槐當時但聞公字致今日不能傳其諱彌甥之罪大矣哉旣而思之前史如野王二老漢陰丈人言行足錄亦不待以名傳公之手澤及周先生所稱道其

品學可概見以視古人奚媿焉誌而述之並舉其字以敬告後世蓋亦先妣之所有待也夫

論曰外氏之宜表章也稔矣昔馬伯庸爲蘇伯修銘劉墓因及其考萬戶君名義者萬戶特一武人且劉尙有後伯修請書之因得有聞於今況我外家無祿以儒門殞厥世而則友公潛德如是可聽其泯泯無傳哉後之人其毋以余言爲贅

外祖陳中憲公三世合傳

鄞後衍陳由明河南提學副使后岡先生著族望其旁支
遷城東石灰街者爲槐母家外大父南輝公諱爨考曰則
友先生以宿學見推賢序公繼入邑庠學使者鄧公鍾岳
實甄錄之復受知東臯竇公志進取不習治生家貧指繁
授徒東石石氏脩入差足具醴鬻舉家安焉生平慎靜尙
寬接物一以和易而介於自守未嘗與人翁翁熱人歎其
賢謂有古黔婁風所居迤東津浮橋而南背塵面江出城
闔望見隔岸板扉卽其巖室其上澂江樓公嘯詠處也讀
書至老不衰手抄經傳及前人制義盈篋皆蠅頭細書槐

於歲得被沾漑至今有藏余家者然公竟齋志沒公生於康熙壬辰九月二十四日沒以乾隆己亥三月三日春秋六十有八配外大母氏許同里慧香菴術著姓以禮法持家先公卒在乾隆乙未十二月二日距生康熙壬辰十二月十六日春秋六十有四合葬道士堰祖阡東畔子一舅氏載音公女子子四長姨母適包次適周三適樂四即先妣來歸後公以先通議府君爲快壻惜未及覩外孫之成立也嘉慶二十四年槐仕山左乃得請

馳贈公中憲大夫外大母恭人

制曰功隆賞懋式宏錫類之仁積厚流光兼廣外家之禮

榮名上逮義問彌彰爾庠生陳曠迺山東兗沂曹濟道童
槐之外祖父出自有基後來稱秀宅鍾華胄充闕澤衍縹
緗慶集繁禧匡國名高黼黻興宗兆叶糜爵階崇茲以覃
恩賜貽爾爲中憲大夫錫之誥命於戲良臣懋績旣增舊
德之光外氏蒙恩丕煥新綸之采式承麻渥庶慰旌揚
制曰職崇朝宇嘉丕績於良臣澤沛綸章推鴻慈於外氏
重闡錫慶累世承麻爾許氏迺山東兗沂曹濟道童槐之
外祖母軌儀嫺習風範淑嘉主饋宜家啟後來之俊秀延
麻相宅邀三錫之寵光啟佑有原恩施宜沛茲以覃恩馳
贈爾爲恭人於戲芳規未邈尙貽昌大於方來寵賚仍加

庶保昭融於罔斃用酬懿訓祇荷隆施

舅氏載音公諱損性穎悟四歲能對客背誦禹貢長有才
辨善屬文工書然屢躓童子試外大父下世公困甚投城
守營繕冊自給始猶與諸從守先人居既皆凋散乃寄身
泥橋巷營屋亡何病失血乾隆己酉六月二十八日故其
生以己巳四月十一日得年四十有一配舅母江北李氏
考亦邑諸生歸陳產一子一女遽卒殯道士堰先塋左十
步許及舅氏之喪啟而合窆焉子鎮女適薛福焯方九歲
時舅氏攜至余家屬先妣教養既長爲嫁之

中表弟安岳鎮其名原名得順少失恃常寄於外先府君

憂其非壽者相亟勸窮氏繼室弗果君十歲就食余家與
余並入塾其後往來周氏及營屋定始得歸膝下任炊汲
司啟閉役使良苦無幾微見於色父喪後或薦至裘家漕
市肆賓主洽甚主人方欲字以女猝嘔血來告先妣因畱
以調養次日夜分氣決痰壅而絕壬子正月七日也年僅
十九余家殯斂之以耐其先塋外大父有昆季各一長房
猶子名最季房名餘祥嗣皆單竟無可議繼者方君將去
營屋以最公子媳儻居近奉兩世栗主及像暫寓焉已而
不知所往

論曰中憲公以隱德君子約其身復不延其世天乎人耶

昔蘇伯修傳外祖以慰親今余將承先妣志乃在若敖之
祀矣主及像設祀所憑也亡之何以逮遠故召工畫紙爲
神位而次事實作傳書於上方以示子孫嗚呼外氏三世
惟此而已悲夫時在道光二十年庚子望前三日外孫童
槐謹述并書

周仲甫傳

鄞三法卿坊下有周君仲甫之卜肆焉臨市甚囂君囊人無簾可垂常子身嚮敝几抗聲讀易見者爭笑之應童試至五旬餘不售學使者某喜物色幼少誤錄及君覆考日遽欲斥退轉詰汝有何長敢邀選曰頗明易理則益怫然令就案側自陳徐察之兩目深碧面有寒鐵色且口講手畫旁若無人學使心動覺無以相難者竟得不黜然數月即死矣有無賴子猝踣道上越日而蘇自言醉與厲搏值官府至厲驚避曰本坊新土地神來護汝耶神召余命隨一卒歸并囑自後勿貪飲伺其聲音面貌乃周先生也君

爲人近迂怪文亦如之而獲見售某公令不得逞狂暴余固疑其可以爲神繼此更有異徵則嘉慶丁卯余在都慈谿鍾明府上計北來爲余言者慈有某姓孤兒由兩節婦撫育成立以嗣兩房遭大疫危甚節母懇冤投牒城隍祠兒忽蹶起作神語曰若欲延兒命曷叩請鍾縣官來如命奔告縣署鍾異之即往兒拱手稱老父臺言陰律重殺牛渠家世食牛肉當絕嗣惟兩母苦節可憫欲令舉族改悔永不復犯庶得援免此兒然非老父臺嚴加禁約移牒本司無憑上達耳鍾立召兒族環跪設誓神曰必具結呈縣加結方可鍾因飭具結並諭曰吾從此爲神稽察脫有犯

禁必先斃杖下衆惶悚稱不敢乃爲加印結具牒焚之仰
面問曰可矣乎曰可矣又曰尊神何稱下官爲父臺曰余
爲鄰邑生員周仲甫應爾也復拱手作辭別狀兒病尋愈
論曰聖人不語神非爲其不正以非窮理之至未易語耳
至食牛當戒微特道家言然今律例禁宰耕牛稍知畏法
宜無敢犯而服儒衣冠者或至就屠門大嚼何也豈謂郊
廟所用之牲食之無罪過歟余聞乾隆間有人問胡會元
紹鼎何以不食牛肉胡口占七絕對曰生果封侯死廟食
太牢坐享足春秋丈夫白首無勳業恥助偷兒剝老牛偉
哉斯語使周君聞之亦當首肯矣

漆濱先生傳

先生姓陳氏名某居富平之漆濱遂以爲號少補邑弟子員每省試輒病終不能一赴以所學教授於鄉特行甚方一介不苟取與年八十猶得事其父父年九十有五子三八年皆六十有五鄉人以是奇之性嗜酒喜圍棋善撫琴能自製琴曲日嘗設楸枰於几左右列飲器數十危坐其中一手引酌一手鏗然落子不必有人對弈也生徒以文藝進則舍棋操管酌如故雖盡一石後所筆削皆蠅頭楷書夜則撫絃動操愔愔然達旦日食麪纔四兩而貌甚豐自壯至老率如此人亦不知其老焉時余主講關中富平

諸生來肄業者甚衆詢之皆嘗從先生游因爲道其狀且請曰先生奇人也不可以無傳余曰然然吾所以奇先生者在於奇而正正可學奇不可學如諸生言凡其所以奇皆出於天者也豈獨天倫間哉然使先生於處事待物一任疏脫之性則是晉人故習復何奇夫固以其學行之正也而奇乃益見而或嗜奇而不惟正之學則猶夫知天倫之事之不可強而日爲無益之羨慕也是鄉人也

胡藕灣編修墓碣銘

吾郡百十年來諸先達無以詞曹乘使車者去年夏藕灣承

簡命副徐給諫法績出典湖南鄉試郡中宿素之士持邸抄相眎動色謂當遂振起亡何聞至則奄沒闕中矣哀哉其弟定山哭赴楚迎旅櫬歸卜兆南鄉湖山之麓旣窆用葬令立碣墓隧乞其同年徐侍郎士芬篆額曰清翰林院編修胡君墓碣因請其師童槐銘而鏤諸下方定山言曰錡兄列門下久知其有可表於世者幸維夫子不然兄之生一第一官而已嗚呼吾忍不銘藕灣耶藕灣爲人羸弱

如不勝衣性沈靜篤志嚮學十一歲而孤母蔡太宜人與其執家苦且慰且勉所居爲明余文敏公故宅太宜人嘗指顧歎慕期以代興繇是益厲雖貧至乏食聞近肆市麪許賒貸卽怡然吟誦如故爲詩文藻思清贍弱冠補學官弟子中嘉慶戊寅

恩科舉人庚辰成進士改庶吉士道光壬午散館授編修迎養太宜人京師閱四載丁艱負櫬歸服闋還職尋充國史館纂修日常趨館局外於人事一無預也蓋自其爲諸生隱約閭巷不事襍耀常若有所畏避迄是不改諸公要人及儕輩皆罕覩其面或諷以進取當有術輒哂謝之

然其意實奮發以爲惟修業邀

主知庶幾得尺寸自效近歲被病時劇猶簾閣據几曉筆
暮詩不少休以是入考試差藝稱精善旣銜

命汲汲思爲

國家得士中途咯血憊甚擁襪被入闈命題時猶蹶起商
榷此其所志豈後於人者嗟乎聲利之陷人久矣前史譏
望門競趨之徒至形神佻躁無士君子器局其人即得志
增夸豔擅恃之過即不得志末路無所底翰林爲入相資
苟爾則異日雖求所謂備員三公躡躡廉謹者亦奚可得
藕灣能決然舍彼而守此其本末蓋可見已修短榮悴何

有哉今都御史白公鎔爲其會試房師與尙書王公引之
嘗加愛重焉吾知二公者亦必以是爲足紀也藕灣名鑑
字再國鄞人其先自月湖橋遷南湖門前臨一灣曰藕尾
因以爲號曾祖宗岳附貢生祖恆郡庠廩生考士桂邑庠
生祖考皆贈如其官晉階承德郎藕灣以道光壬辰八月
二十一日卒年四十有七明年五月柩至家葬以九月十
五日娶李氏無子定山以子襄主其祀女一人許嫁慈谿
馮可鈞郎中汝霖之子銘曰

砥之艱兮而鏹未施也條則蔚而天弗之材也曷云無忝
徵余辭也

誥贈通議大夫山東按察使晉通奉大夫王考燕如太府

君神道表

年家子何淩漢填諱

嗚呼我王考燕如太府君以孝謹至行著於百數十年之前我顯考甬川府君以幼孤多所未省逮槐兩世但聞族黨親表中故老傳述無不感歎欷歔久久靡間者嘗謂如此之人在古與今不啻百一焉府君泣語槐曰昔甄逢慮父名不登國史兢兢朝夕卒以行能動史官得書吾與若爲名德子孫顧無可以標目先人又今制惟大臣沒後史館行取其家狀非唐時得自行送館者比計惟識所聞以俟將來或有顯揚地耳槐跪泣受命隨所耳熟比次之因

略見大概太府君諱忠鎬字燕如曾祖諱景晨明冠帶耆
儒祖諱鼎昌

國初授懷遠將軍父諱聚培

誥贈通議大夫太府君其第三子也生質懿嫩淳厚端慤
纔數歲言動舉止凝然迥異於衆見者於昆季五人中目
爲白眉在二親膝下率常跬步不離碧沚公鑒其天性鍾
愛特至稍長嗜學絕倫從事里名宿董次歐先生門徒盛
習舉業太府君性不近志更不在榮世獨潛研諸經子史
務觀法古聖賢事蹟以期躬行實踐於文章喜考工記及
南華皆手錄盈篋衍至今篇帙整正無一卷角者楷法自

首至尾無一筆恠草者日嘗專意色養庭幃瑣屑皆躬親之退則危坐一小室對卷穆如至夜分不倦火滅就寢置鱗燧枕畔夢寐有所憶書即起敲火燃楮以資緝閱夜或三四起慮堂上憫其溺苦則帷於室內使光不射窗戶隙如是者有年值家中落碧沚公寢衰而舊所業都中藥肆爲人折閱以未能往理爲念太府君恩解親憂亟請往雖素未出門間關數千里弗憚也至都按肆中簿籍得虧負數其人無可掩且見太府君仁厚君子不即訟諸官因感媿吐實時三館謄錄供事議敘得官有輾轉賣鬻者其人盜貲鬻得一照圖冒姓名頂充旣敗露即出其照作歸償

計太府君大驚曰此何等事吾豈爲喪貴昧心理從汝犯
大不韙者耶若首告汝必不得生然吾尙不忍汝殺諒汝
已罄所侵蝕亦無從措償汝休矣吾與汝絕可速閉肆其
人叩頭數百竟遁去太府君料檢餘貲納國學爲監生數
月挈空囊反陳顛末請罪碧沚公則嘉歎之謂事理固應
爾勿悔也然家日益窘太府君讀書之外需佐理米鹽會
城守將備傾慕風範聘請至昌國衛校定軍冊不得已往
來其間所入頗資菽水而賙給戚黨不虛所請猶時若歉
於中者與人交新故一以誠從無幾微之忤娶王妣孫太
淑人始至爲日誦內則太淑人會意事舅姑益孝敬焉一

日晏坐閨門內聞街巷呵道聲遽起拱立太淑人見之疑其適然已而無不然傳諸外家孫氏相與嗟訝曰此殆不媿屋漏者習久益稔至呼爲顏子槐在塾偶閱宏簡錄邱爲傳載其居鄉經縣署降馬而趨以質叔祖月島公公曰爾祖蓋有過之因爲詳述此事時世父澄川公在側亦曰吾髫齡所親見尙能記憶也嗟乎邱爲之行其大端止此赫然列在旌德一門與元紫芝權士繇並傳我王考乃備德而不耀且爲享大年至九十六而天奪我王考算會不獲至中歲爲後嗣者痛有終極哉太府君生於康熙四十七年六月二十六日卒於乾隆五年四月五日得年三十

有六孫太淑人同邑耀宗公女以乾隆五年五月四日繼卒距生於康熙四十九年十月十一日得年三十有四合葬西山潘舉之麓嘉慶十四年恭遇

覃恩以孫槐官太府君得

馳贈朝議大夫戶部主事加三級道光元年

誥贈通議大夫

制曰表臣報績爰歸美於詒謀司仕詔功必溯源於繩武殊榮洵被積伐增華爾童忠鎬乃山東等處提刑按察使司按察使今授通政使司副使童槐之祖父衍緒開先垂麻裕後孫枝挺秀聿昭樹德之符世業丕昌大啟承家之

學茲以覃恩贈爾爲通議大夫山東等處提刑按察使司
按察使錫之誥命於戲錫五章而敷澤珂里流光推三葉
以承恩德門襲慶祇膺茂典長荷恩綏王妣以十四年

覃恩

贈恭人累

贈淑人於例得晉王考通奉大夫王妣夫人太府君之卒
也碧泚公哭之慟尋即下世人以爲孝慈之極止遠近多
出涕者太府君二子長世父澄川公次顯考府君孫一即
槐鄞縣學廩生嘉慶戊午優貢庚申

恩科舉人乙丑進士官至通政使司副使曾孫四恩正三

品廕生華可念章俱幼槐自承嚴命思所以效顯揚者迄
今乃得遵會典樹碑神道將撰次所聞爲銘而我府君亦
已不得見矣嗚呼痛哉爰濡淚書琢碑石以誌終天之哀
與茲石永久銘曰

志儒之本韜華英施政厥家衆望傾命胡奄忽神幽貞明
神終勞發其馨燎黃元隧久始榮願惟渺躬難竭誠年運
以往歎後生少好犯上亂奚萌揭此庶爲鄉邦型

誥贈通議大夫山東按察使晉通奉大夫顯考甬川府君

神道表

門下士吳傑填諱

先府君諱孝源字有本別字甬川鄞城月湖白檀里人也
童祖曰伯顓帝之允紹封雁門父字爲氏東漢著望姑幕
南宋分支義烏則吾甯建輿一派所自矣由建輿遷月湖
凡十二代至府君王考諱聚培考諱忠鏞兩世皆贈通議
大夫府君夙遭閔凶連失怙恃煢生銜恤信居喪若成人
寄育受辛署不幸爲小字是時年甫六齡耳已而趨侍祖
庭願代子職著虞詡孝孫之稱抒靈運述祖之慕遺命析
產多推友于獨受薄田數畝以農業佐儒術焉性耽劬學

發楹書讀之如嗜食飲叔父月島公授經家塾座上皆鴻
生鉅儒府君時預末席飮聆緒論警悟之餘深以研究若
史雪汀全謝山范申伯諸先生訝其詰問辨難反覆不窮
嘗願謂月島公云此非宋人所稱古事莫語子容今事莫
告君實者耶積學既富彌恥一物不知惟道淑身自覺萬
物皆備常曰晚食當肉安步當車清靜真正良足自娛觀
末俗紛紛歎其矯情獲百利不如正心歸一善也生平質
直好義於人樂爲盡力識微鑑遠治事綽然有餘顧陋窮
終身不耀於世天殆以全其高而善其獨用敷遺後人休
歟年六十有七嘉慶六年二月八日捐館舍先妣陳夫人

考諱熿鄞邑庠生馳贈中憲大夫先妣幼習書史嫺禮法
笄年作嬪持家以儉勤待物以仁恕相夫教子備著德聲
家道之不殞懿範是賴年六十有九傾背於甘肅蘭州道
官署內寢先府君之違世也以壬戌三月一日安厝於西
鄉五嶺原之陽阮中丞師方撫浙爲撰墓表槐以有待未
即上石越十五年丙子四月三日祔葬先妣中丞師又銘
其墓槐適已除服當赴都復致遲緩逮至道光紀元恭遇
覃恩先府君得由朝議大夫累贈通議大夫

制曰夙夜宣勞事君資於事父雲霄布澤教孝實以教忠
特賁絲綸用光閎闕爾童孝源乃山東等處提刑按察使

司按察使今授通政使司副使童槐之父操修瀆篤矩範
巖明術在詩書克啟趨庭之訓業恢堂構實開作暨之模
茲以覃恩贈爾爲通議大夫山東等處提刑按察使司按
察使錫之誥命於戲錫天府之徽章殊榮下逮際人倫之
盛美茂典欽承祇服誥詞茲光譽問先妣由太恭人累晉
淑人

制曰家聲昌大夙彰式穀之休壺教賢明不替樹護之慕
適逢上慶用錫殊榮爾陳氏乃山東等處提刑按察使司
按察使今授通政使司副使童槐之母敦習禮規恪循箴
訓寢門治業著恆德於貞心閨塾授經寓慈風於雅節

以覃恩贈爾爲淑人於戲恩能育子挺杞梓之良材善必稱親被笄珈之茂寵祇承嘉獎允播徽音按例先府君且得晉通奉大夫先妣得晉夫人矣夫久而益榮庶沒而不朽張燕公表丹州之兆非必假詞於他歐陽子表崇公之阡實在累封而後尊卑雖殊揭諸神道者其則不遠然文直事核仍賴阮筆謹繕前稿分勒碑陰左右年月日男槐表

童處士墓表

附

阮元

君諱孝源字甬川先世義烏南宋遷鄞祖某州判父某國子生有孝行勵學與妣孫孺人相繼卒君纔六歲居

喪如成人以祖母陳命依季父居季父嚴以君力學不
事生產出之外舍有地數弓乃益發書讀之從師遊遂
通小學史漢旁及百氏既壯舅陳明經廉知孝友妻以
女復以舅爲師然不事舉業嘗曰吾先人以隱居著書
不求宦達今有書有田復奚志哉由是入則橫經出則
負耒歲以其入調親黨之貧乏者有券至四百緡悉燒
之復力疾修遠宗墓廬雖困踣不顧也戊午槐以優行
第一貢太學庚申考取武英殿校錄秋順天鄉試中式
聞至君已疾願孺人曰吾殆不起異日當勸兒以黜浮
崇實勿替祖父之訓也疾竟卒年六十七子一槐女四

表曰

古獨行農而土帶挂經室懸耜存嫺睦絕怙侈老能教
長可紀式彝訓生才子銘旣藏表足視崇善良告惇史
童母陳太恭人墓表

附

阮元

太恭人姓陳氏鄞縣名儒曠之季女適童爲贈朝議大
夫甬川先生孝源配生子槐太恭人通詩書槐襁褓中
即教以字稍長就外傅贈公率嘗客遊太恭人晨夕考
所業弗少倦若嚴師然與人恭惠仁愛雖賤者皆遇以
禮治家有法度凡婚嫁喪葬之事稱家所有部署適當
家無中人產三黨有以匱乏告者賙之恐弗逮進一食

有一不得食者立其側弗甘也御一衣有一不得衣者
在其側不煖也槐官御史時常夜歸爲奏草太恭人召
之前曰兒所言事吾不當與聞即有所彈射宜出必不
得已乃發若許人短以炫已長乃已之短也一糾一舉
國是繫之勿借以立名可矣子一即槐嘉慶乙丑進士
禮工部主事歷官甘肅蘭州道女子子四適謝徐張周
孫一慰女孫二嘉慶十四年封太恭人十九年四月二
十八日卒於蘭州官署年六十有九槐奉喪歸鄆始元
爲浙學政時舉槐優行第一因得知其有賢母旣聞太
恭人教槐之言而歎曰大哉此言夫古所稱名臣非無

矯異絕特之節概足以震世俗厲世做也然當時之人
或得被其福或不得被其福豈節概固不盡同大都其
意之始發有公私之異耳觀太恭人所以勛槐誠深識
大體豈煦煦博忠厚名者哉二十一年四月三日祔葬
於鄞西五嶺之原距贈公之葬十有五年矣銘曰

母之爲教有德有文閱厥幽光耀其後昆長松堅石鞏
此墓門

贈中議大夫先叔祖月島太府君墓表

公諱忠鉉字玉如又字月島我曾王父碧沚太府君有五子公其四也軀幹修偉美鬚髯儼有文武才讀書窮奧突豪於詩文兼便弓馬弱冠與里中名士結社凡十人應試雋其九公慮無以慰高堂時功令文童願即本科改武者聽姑就之遂冠一軍入邑庠學使者鄧公鍾岳閱其論驚喜自詡爲得一名將公感知遇益肆力於七書韜略之精前輩武甲科莫及焉會風氣變而尙力令材官得應舉公恥伍噲等遽退歸而新例更取行伍入學謂之兵生因竊歎曰古者以習射興賢以敦詩命帥文武合一故才望

尊今進推埋於校序以蔑詩書之教使弟子員與走卒等
吾何忍爾其間哉乃投牒移疾甘老一矜然知公者愈重
其學識公亦自是泛覽羣書思託著作之林所與游皆達
人長德非特武生不敢仰視即一時文士無弗逡巡拜下
風矣嘗就聘遊幕越中及嘉禾羈縲數年所在名輩推襟
送抱中年後講學家塾延接諸老先生於雪汀謝山二公
爲尤洽餘若姜白巖范申伯仇朴童屠鴈湖蔣樗菴邵東
行恆造門無虛日相與談經史小學詩古文彙及稗官野
乘靡所不究公手疏填巾箱迄今緇閱浩如煙海而與槐
少承先府君所提命往往印合蓋曩昔聚論一堂我府君

之學問淵源實在乎是焉雪汀史先生之沒也餘一孫滯
京師家四壁立停兩喪未舉里後學嚮視先生爲龍門至
是無過問者公奮然曰是余之任即措貲卜壤舉二喪執
紼徒步數十里引柩至壙旣窆將祭適雨甚杯罍皆水爲
哀泣籲天稍霽得成禮而返聞者感動咸謂范巨卿之於
張元伯殆不是過甥張斤蘊明經有詩紀其事且曰先生
嘗作桂竹篇貽公固以公爲死友也然其生平風義亦尙
多類此嗚呼此豈今人所易有哉晚歲略涉二氏有西江
龍虎山法官授以道籙即能持符咒主法事而天童尊宿
亦謂有香火緣樂與講誦由是黃冠緇流接踵書舍杖履

所及惟浮屠老子之宮矣顧於承家志業至老未衰槐兒
時問字曾授章句比就外傳歸呈課藝輒喜動顏色期以
大吾宗因命曰余未及奉揚先人之媿昔李習之能著皇
祖實錄汝異日其勉諸槐誌弗忘是以補撰碧泚太府君
行狀恨未及使公得見耳公壽七十有三卒於乾隆五十
二年十一月十七日前二日起居如常忽作囈語若與鬼
神酬答者舉室惶駭召槐至則仍與論文神氣清朗不少
變徐謂曰後日申刻予將行自今宜絕粒可但以沈香煎
水飲余且命市楮錢數百分署犒輿馬夫字樣就大門外
焚之槐亟請問何往曰赴江西九江道署土地神之任遂

閉目不復言及期果起坐正衣冠一笑而逝嘻異哉公素性正直即面斥人過人不敢怪至是無一不信其爲神者元配袁太淑人蚤卒繼室黃太淑人生三女皆適士族太淑人以嘉慶二十年十一月十八日卒壽九十有四合葬西山潘輿之麓道光紀元

覃恩以槐官

贈贈公階中議大夫通政使司副使加一級袁黃兩太淑人並贈淑人先府君痛淑父乏嗣前命槐循兼祧之例世世守家承祀云

馳贈通議大夫曾祖考碧泚太府君行狀

公諱聚培字天因號碧泚先世鴈門人至東漢丹陽太守
恢著籍瑯邪姑幕政績在班史循吏傳自後多南遷者婺
州有義烏一支明州則鄞之建輿慈之門谿皆稱繁衍宋
元祐紹聖間曰鞞曰韞以從弟昆先後登第官翰林實建
輿派也韞十四葉至諱全明洪武中鄉貢用薦充國史院
纂修嘗僑居鄞城是爲公始祖六葉至高祖春山公諱德
富仕雲南大理府同知曾祖望山公諱端仕貴州安順府
通判卜築月湖之北醋務橋今所居其遺址矣祖寅陽公
諱景晨考明新公諱鼎昌字季萃

國朝授懷遠將軍公生康熙十三年正月十日幼讀書穎悟遭母周太孺人喪哀毀如成人尋事繼母鄭無異所生明新公察其性行已許爲克家子年十八命分肩家政不得已廢書客遊數載歸益嚮學約與姻戚家共延名師朝夕往從遊其學以務實爲主輯經傳中嘉言懿行求所以爲人之道故孝友忠信之行終身無間視世之事咕嗶以弋取浮名者非所屑也年二十五入粟補國子生遂絕意仕進初望山公貴累千金季年驟落寅陽公復居積致富治田宅舟山猝遭殘明寇亂舟山隔絕盡棄之明新公僅受遺產十數畝窘甚乃廣用計然策銖積寸累漸還舊觀

至是一以屬公且曰吾家三世來旋興旋替何道而能使
稍久公謹對曰此或是數定惟當持儉勤蓄隱德以貽後
耳是時除舊有典當肆外增金珠參藥米穀木植靛青桐
菜柏油及估衣作酒等業本城設行鋪數處公審擇可任
者爲主管素性正直不逆詐給本銀無慮千百以歲時合
會計而已餘若蘭谿蘇州山東之登州萊陽貿遷所至不
憚涉歷江海於京師西四牌樓北街設有藥肆亦嘗親往
經理也以所入興諸善舉數十年如一日修先塋營丙舍
置義山一區收葬同姓無主數十棺至今有賴之者贈族
媼老孤於貧乏之朋舊或館或殯及歉歲施里中粥餌衣

縣藥物不可勝計復以郡縣官敦請督修慶雲樓各工既
任勞又捐費一無諉謝父喪葬祭如禮爲一時士大夫所
矜式兄弟五人公居次長兄及三四兩弟皆蚤世五又在
穉齒明新公捐館以前曾手定分書析產爲五命公總持
其事俟弟姪成立撥分公奉命惟謹雖任大責重處之常
裕如焉亡何各房外侮日至親串不肖者覬幼弱可啖結
里中無賴子搆訟多端公不得不出身當之連年耗費無
已而典肆久任之主管乘公倥傯鮮暇亦頓萌異志侵盜
典本殆盡又諸所設市肆及住宅節次被火災數載內焚
掠一空公心力交瘁知己萬無可爲亟收各處所業鉤考

出入計存產纔足按分書給四房之數乃悉數撥給而以
身任債累斥已產次第畢償家遂四壁立晚年僦鄰屋數
間時自釀秫以資衣食嗚呼是非所謂數定耶然公生平
和易慷慨與人必以誠信人見其暮景茹荼無不爲之嗟
歎而公意泊如也性本超曠夙喜遊覽名山古剎如鄞東
天童寺奉邑雪竇寺南海普陀會稽禹廟諸名勝皆蚤歲
所歷中年訪友至湖廣得登衡岳爲一生快意事每生辰
寫照如帶劍等圖名人題詠者多目以陳元龍湖海之士
公亦稱爲知言公最勤筆疏著年譜自十數齡訖終年六
十七羅列如指掌聞義烏蘭谿各有宗譜輒轉乞請一本

以歸存。竢考訂他若始祖以下歷世事迹及旁支世系田宅市肆契據并交涉官事印券等項凡經寓目輒條綴件繫細書作數十冊畱遺至今噫國無文獻不足以爲國惟家亦然吾童氏自建輿遷郡城始猶播越未定故紀載缺如入

國朝來傳家事業略可紀矣而貲產屢經中絕即曩所立各房不一二十年而蕩析離居幾莫能自知始末君子之澤五世而斬正其時矣向非公承先啟後則今日猶孰知有醋務橋童氏公所云隱德之貽其不寓於是耶此槐所以每攬手澤不禁泫然流涕者也公以乾隆五年庚申四

月二十五日卒春秋六十有七嘉慶二十五年八月二十
七日以曾孫官

馳贈通議大夫山東等處提刑按察使司按察使

制曰嘉謨垂奕葉允昭世德之求殊寵錫公朝益展曾孫
之孝祇承新渥用報曩徽爾童聚培乃山東等處提刑按
察使司按察使今授通政使司副使童槐之曾祖父敦修
無斃垂教有方種德開先堂構益恢於來緒詒謀裕後箕
裘克紹於前麻懿德攸彰恩施遂逮茲以覃恩馳贈爾爲
通議大夫山東等處提刑按察使司按察使錫之誥命於
戲四世其昌久聚德星之慶九原可作允承褒命之榮國

典游膺家風益振配會祖妣陳孺人國學生諱玉景公女
生於康熙十七年九月十五日卒於乾隆二十四年二月
二十三日

馳贈淑人

制曰綏柔佐治寵旣被於外僚貞順垂庥恩聿推於內德
特敷惠澤用播徽音爾陳氏乃山東等處提刑按察使司
按察使今授通政使司副使童槐之曾祖母肅雍可範令
美堪模樹慈訓於後昆爰著鍾祥之德傳素風於奕葉式
彰詒穀之謀允作母儀用昭國典茲以覃恩馳贈爾爲淑
人於戲九重錫慶游邀丹誥之榮四世承恩益煥朱幘之

色勤宣令聞用闡幽光卒後合葬於西畧黃土坪側室沈
蘇人先卒至是並祔焉子五長忠鉅娶湯氏次忠鉞娶古
氏三即槐祖考諱忠鎬

誥贈通議大夫山東按察使司按察使配祖妣孫孺人
誥贈淑人四忠鉉鄞學武生以槐官

馳贈中議大夫通政使司副使加一級娶袁氏黃氏皆
馳贈淑人五忠鉞娶劉氏女二長適康熙甲午科武舉張
霖次適范三來皆陳淑人出孫六人長孝治次孝洽次孝
法次孝淵爲槐胞伯以姪孫官

馳贈奉直大夫直隸宣化府延慶州知州次即槐父諱孝

源

誥贈通議大夫山東等處提刑按察使司按察使次孝清
曾孫傳梓傳桂傳椒傳楠傳柏槐傳楷槐嘉慶乙丑

賜進士出身由工部主事軍機處行走改戶部陞員外郎
郎中陝西道監察御史歷任甘肅蘭州道山東兗沂曹濟
道江西山東湖北按察使通政使司副使

誥授通議大夫元孫恩正三品廕生內用通政使司經歷
改知州補直隸延慶州知州調補開州知州陞授奉天府
治中加鹽運使司運同銜

誥授朝議大夫華道光戊戌

賜進士出身改翰林院庶吉士

授職編修加四級

誥授奉政大夫己酉科鄉試湖北正主考可念候選布政使司理問議敘加鹽課司提舉銜章附貢生候選儒學訓導會開皆縣學增廣生並槐子來孫鳳岡附貢生候選儒學訓導改授北城兵馬司副指揮

欽加六品銜

敕授儒林郎鳳翹附貢生選授定海直隸廳儒學訓導

敕授修職佐郎坊國學生皆恩之子瑞麟華之子瑞熊章之子祥麟華之子祥熊章之子瀛垞可念之子又麟振麟

章之子桂麟會之子榮麟鍾麟開之子槐夙聆庭訓得悉
太府君承先啟後備歷辛艱當捐館時恨家適中微竟無
銓述其生平行略者蘊結數十年以恭遇

覃恩例得請贈因竊就所聞爲狀茲重加攷訂謹定如右
尙冀立言君子錫之鴻篇鉅製俾垂家乘久而彌光則世
世子孫感且不朽云

湯將軍哀辭

并序

兩生湯將軍在浙時嘗介友人屬題尊慈斷釵吟冊余按
事略愾想其家世且度君爲天資忠孝人也越廿載不復
知狀偶閱其族子徵詩文啟則君竟以寓公殉難金陵矣
嗚呼天之降罔何如哉自海內風塵頽洞有其始之莫或
止之年來聞在官親知消息蓋慟不勝慟抑古有云識於
生時而哀者爲私哀昧於生時而哀者爲天下之公哀君
生時余故未識面攬絕命詞不禁涕泗橫集也因爲誄以
哀之曰

二百餘年兮承平宇建業江山兮足遊處蚤日兮解組祇

信將軍兮不好武嗚呼將軍生長兮忠孝門堂署雙忠兮
搖精魂水周兮堂下俄咫尺兮洪濤翻天方蹶兮泄泄曲
突徙薪兮嗷余爲非計羣盜起兮蝟毛節鉞紛紛兮棄城
逃城不存兮軀分沒餘故將軍兮恥媮活一生兮文采五
字兮悲慨附蒼頭兮來草中首不回兮遑憶家所在嗚呼
天綱兮淳涵妖焰肆兮安極慘藁葬兮見發胡卷軸兮並
遭狐搢聞龜堂兮曾闕瓊寶祠像一毀兮終失遺稿聚文
字兮生災君達觀兮尙其無懊惟元元兮何辜幾隨軫兮
淪胥仰

列祖兮在天方綜萬域兮席蘿圖將軍兮將軍首爲山嶽

兮身爲江湖氣罍輪兮馭羣螭而上徂昔天帝兮討骨蕞
賴文人兮實助力君不待兮巫陽招諒行軍兮擅韓筆願
請命兮紫皇統威神兮臨故鄉朝蘭陵兮發軔夕秣陵兮
埽氛盡嗚呼虞夏旣遠兮箕頴俱危天地常閉兮生人奚
爲立忠義兮自千古

國與民兮猶恐無補攬君辭兮淚雨盼雲旂兮爲余久延
佇

長女啟攢告祭文

維年月日老父使汝三弟普五弟會六弟開以清酒時饌
之奠致祭於例贈宜人亡長女家祥小姐葉氏宜人之靈
日吾以汝許嫁於葉兮在汝生之十有三年旋挈汝於京
邸兮何圖嬰疾而不延送汝棺至通潞兮歸厝於母墓之
西偏距今卅逾二載兮值前春母墓之既遷吾痛汝魂單
而無所託依兮心目爲之悵悵汝夫壻曰夢漁兮實好古
而賢請迎柩以待耐兮先殯於杜輿之新阡按古已字之
女不爲殤兮蓋於嫁殤之禁相懸吾旣揆諸義而可行兮
爰乘歲之吉以啟駟汝諸男已有四兮咸能致孝而告虔

汝膺例贈而被象服兮將歆世祀於葉廟之几筵
豈人天之永遠而不爽約兮世且傳爲佳話而羨
此生死之奇緣
知汝之得所歸兮亦當含笑於在天惟鄭慈之
相隔而去
吾愈遠兮吾轉不禁隕老淚於風前尙爨